



Hadž – škola znanja i djelovanja (Medina)

Hatib: dr. Abdullah ibn Abdurrahman el-Buajdžan

25. zulkade 1446. po Hidžri / 23. maj 2025.

Hvala Allahu, Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Koga Allah uputi, niko ga ne može u zabludu odvesti, a koga Allah ostavi u zabludi, niko ga ne može uputiti. Svjedočim da nema boga osim Allaha, Jedinog, Koji nema sudruga, i svjedočim da je Muhammed, sallallahu alejhi ve sellem, Njegov rob i poslanik, dostavio je Objavu, ispunio emanet, savjetovao ummet i ostavio ga na jasnom putu, čija je noć kao i dan, i s tog puta neće zalutati osim onaj ko sebi želi propast. Neka su Allahov blagoslov i mir na njega, na njegovu porodicu, njegove ashabe i one koji slijede njegovu uputu i sunnet do Sudnjega dana.

Najistinitiji govor je Allahova Knjiga, najčvršća veza je riječ bogobožnosti, najbolja vjera je vjera Ibrahima, alejhis-selam, najljepše kazivanje je Kur'an, a najbolja uputa je uputa Muhammeda, sallallahu alejhi ve sellem. Najgore stvari u vjeri su novotarije, a svaka novotarija je zabluda.

O vjernici, pokornost Allahu donosi najveću korist i dobitak, a Njegovo zadovoljstvo najvredniji je cilj. Džennet je prekriven neugodnostima, a Vatra prohtjevima: "I samo na Sudnjem danu dobit ćete u potpunosti plaće vaše, i ko bude od Vatre udaljen i u Džennet uveden – taj je postigao šta je želio; a život na ovome svijetu samo je varljivo naslađivanje" (Ali Imran, 185). Stoga, bojte se Allaha u onome što vam je naredio, i klonite se onoga što vam je zabranio: "O vjernici, bojte se Allaha onako kako se treba bojati i umirite samo kao muslimani!" (Ali Imran, 102).

O ljudi, nalazite se u svetom mjesecu, na svetom mjestu i pripremate se za obavljanje jednog od temelja islama – hadža, hodočašćenja Allahove kuće. Dio pripreme za ovaj ibadet jeste učenje o njegovim propisima, pa je obaveza svakom muslimanu, koji se





sprema za hadž, da nauči kako se hadž pravilno obavlja, da upozna njegove sastavne i obavezne dijelove (rukнове i vadžibe), i ono što je zabranjeno činiti za vrijeme hadžskih obreda (mahzurat), te posljedice kršenja tih zabrana. Znanje je preduvjet djelovanju, a Allah se ne obožava slijepo, već znanjem i razumijevanjem. Uzvišeni kaže: "Znaj da nema boga osim Allaha! Traži oprost za svoje grijehе i za vjernike i za vjernice! Allah zna kud se krećete i gdje boravite." (Muhammed, 19) Znanje, dakle, prethodi riječima i djelima.

O vjernici, stjecanje znanja izraz je strahopoštovanja, traženje znanja je ibadet, njegovo istraživanje je džihad, podučavanje drugih je sadaka, a dijeljenje znanja je kurbet – čin približavanja Allahu. Ništa čovjeka više ne može približiti Allahu kao što može znanje koje mu pomaže u ispravnom obavljanju ibadeta. Allah vam je olakšao sredstva i dao vam povoljne okolnosti, pa niko nema opravdanje za neznanje. Svi resursi su dostupni i dokaz protiv vas je uspostavljen.

O ljudi, učenje propisa hadža dio je njegovog izvršenja, pa čak i uvjet njegove ispravnosti. Stoga, trudite se da ih naučite na ispravan način od pouzdanih učenjaka i relevantnih institucija, kako biste obavili hadž na ispravan način.

Allah vam je olakšao ono što nije bilo dostupno prethodnim generacijama: savremene metode poučavanja, specijalizirane platforme za educiranje hadžija i vizualne smjernice na više jezika. Postoji li nakon svega ovoga izgovor za neznanje? Može li iko tvrditi da nema mogućnost da nauči? Iskoristite ovu priliku, učite o hadžskim obredima i budite od koristi gostima Milostivog. Naime, Uprava za vjerske poslove u Mesdžidul-haramu i Poslanikovoј džamiji, kao i Opća komisija za brigu o tim svetim mjestima, uz Ministarstvo hadža i umre, na svojim edukativnim platformama objavili su sve usluge potrebne hodočasticima i posjetiocima, od naučnih smjernica, koje se oslanjaju na Kur'an i sunnet Poslanika, sallallahu alejhi ve sellem, pa do sigurnosnih, zdravstvenih, organizacijskih i administrativnih instrukcija. Iskoristite ih i oslonite se na njih, a neka vam Allah primi vaš trud!

Gosti Milostivog, hodočasnici Allahove Kuće i posjetioci Poslanikovoг mesdžida, Allah vam je ukazao veliku čast i omogućio vam posjetu Medini, voljenom i





blagoslovljenom gradu, mjestu Poslanikove hidžre, i njegovom utočištu, kući i boravištu. To je jedno od najodabranijih mjesta na Zemlji i Allahu najdraže nakon Meke. Znaajte njenu vrijednost i značaj, poštuajte njenu svetost, budite svjesni veličine ovog grada i ponašajte se u njemu najljepše što možete. Čuvajte se da ne narušite njegovu svetost i učinite neko zlo, jer Poslanik, alejhis-selam, rekao je: "Medina je harem (sveta). Ko u njoj uvede novotariju, ili izazove smutnju, ili zaštiti nekoga ko to čini, na njemu je Allahovo prokletstvo, prokletstvo meleka i svih ljudi. Na Sudnjem danu od njega neće biti primljen ni farz ni nafil." (Muslim)

Allah vas je počastio posjetom Poslanikovom mesdžidu, čiji su temelji, već od prvoga dana, postavljeni na strahu od Allaha. To je jedna od najodabranijih i najvrednijih Allahovih kuća na Zemlji, i ibadet u njemu vrijedi mnogostruko više nego u bilo kojem drugom mesdžidu, osim u Mesdžidul-haramu. Prema predaji od Ibn Omera, radijallahu anhum, Poslanik, sallallahu alejhi ve sellem, rekao je: "Namaz u ovom mesdžidu bolji je od hiljadu namaza u nekom drugom, osim u Mesdžidul-haramu." (Buhari i Muslim)

O ti koga je Allah počastio posjetom Medini, posjetioče Poslanikovog mesdžida, kročio si svojim stopama na blagoslovljenu zemlju, u mjesto najdraže Allahu nakon Meke. Budi svjestan blagoslovljenosti ovog mjesta, poštuuj njegovu svetost, pridržavaj se u njemu islamskog bontona, čuvaj njegovu tišinu, mir i strahopoštovanje. Izbjegavaj uznemiravanje onih koji obavljaju namaz, ne prelazi preko njih i budi obziran prema svim hadžijama i posjetiocima. Izbjegavaj naguravanje u gužvama.

Posjetioče, ovo mjesto namijenjeno je za ibadet, pa se kloni svega što se protivi islamskim propisima, novotarija, odstupanja od propisa, izazivanja smutnje i grijeha. Ne budi uzrok odvrćanja ljudi od skrušenosti i pokornosti Allahu.

Posjetioče, iskoristi priliku koju ti ovo mjesto pruža, predaj se Allahu s ozbiljnošću, odlučnošću i čvrstom vjerom. Ibadet ovdje ima posebnu vrijednost, a nagrada se umnogostručuje, stoga ne troši svoje vrijeme na nemar, beskorisne rasprave ili prekomjernu upotrebu telefona. Ne dozvoli da te ovosvjetske brige odvrate od ibadeta.





Posjetioče, slijedi upute nadležnih tijela, zaduženih za pružanje usluga i održavanje reda. Pridržavaj se propisanih smjernica i budi pomagač u dobru, a ne uzrok grijeha. Allah kaže: "I pomažite se u dobročinstvu i bogobožnosti, a nemojte se pomagati u grijehu i neprijateljstvu." (El-Maida, 2)

Allah nas učinio od onih koji slušaju Kur'an i slijede ono najljepše u njemu, "njima je Allah na Pravi put ukazao i oni su pametni" (Ez-Zumer, 18).

Hodočasnici Allahove kuće, ibadet nije puka tjelesna vježba, već je pokoravanje Allahovim naredbama, i ostavljanje onoga što je On zabranio, te poniznost i predanost, iz ljubavi, želje i nade u Allahovu nagradu i straha od Njegove kazne. Za njegovo primanje (kod Allaha) potrebno je ispuniti dva uvjeta:

prvi uvjet: iskrenost prema Allahu, da namjera (nijet), zbog koje se čini ibadet, bude traženje Njegovog zadovoljstva, bez primjesa bilo čega drugog;

drugi uvjet, ibadet mora biti u skladu s onim što je Allah propisao u Kur'anu i sunnetu Njegovog Poslanika, alejhis-selam.

Osnova ibadeta je slušanje, slijeđenje i pokoravanje, a ne lični prohtjevi i novotarije. Aiša, radijallahu anha, prenosi da je Poslanik, alejhis-selam, rekao: "Ko uradi nešto što nije od naše vjere, to mu neće biti primljeno." (Muttefekun alejhi)

Stoga, trudite se biti iskreni prema Allahu i slijediti praksu Poslanika, alejhis-selam. Džabir, radijallahu anhu, kaže: "Vidio sam Poslanika, alejhis-selam, kako baca kamenčiće sa svoje jahalice na dan Kurban-bajrama, govoreći: 'Preuzmite od mene svoje obrede, jer ne znam hoću li obaviti hadž nakon ovog.'" (Muslim)

Hodočasnici Allahove kuće, Allah vam je ukazao veliku počast i omogućio vam da ispunite obavezu hadža. U ovaj ibadet uložili ste veliki trud i imetak, pa neka vam je s hajrom, kad ste već donijeli nijet, i neka vam je s bereketom, ako je vaš nijet iskren. Trudite se da hadž obavite ispravno, potpuno i da vam bude primljen. Upoznajte se s njegovim propisima i klonite se neprimjerenih riječi, grijeha i rasprava: "Hadž je u određenim mjesecima; onom ko se obaveže da će u njima hadž obavljati nema





snošaja sa ženama i nema ružnih riječi, i nema svađe u danima hadža" (El-Bekara, 197).

Budite smireni, dostojanstveni i milostivi jedni prema drugima, izbjegavajte naguravanje i budite obazrivi prema slabijima. Džabir, radijallahu anhu, prenosi da je Poslanik, alejhis-selam, povukao uzde svoje jahalice prilikom napuštanja Arefata, tako da joj glava gotovo dotakla njegovo sedlo, dok je govorio: "O ljudi, smirenost, smirenost!" (Muslim)

O ljudi, Allah je odabrao ovu zemlju kao mjesto objave, kiblu svih muslimana i stjecište njihovih srca, i povjerio joj brigu o svetim mjestima i obezbjeđenje sigurnosti onima koji obavljaju tavaf, borave u džamiji i čine ibadet Allahu. Ujedno, ova zemlja počašćena je hizmetom hodočasnicima, mu'temirima i hadžijama, i svoju misiju vrši časno i besprijeckorno. Osigurala je sve potrebne usluge za hodočasnike i posjetioce, kako bi im olakšala obavljanje obreda, zaštitu, sigurnost i ugodnu posjetu.

O Allahu, zaštititi hodočasnike Svoje Kuće i posjetioce Poslanikovog mesdžida!

Čuvaj ih Svojom zaštitom, obaspi ih Svojom brigom i vrati ih njihovim porodicama zdrave i sretne, o Gospodaru svjetova!

Olakšaj im obavljanje obreda hadža, primi njihove ibadete i učini njihov hadž primljenim, trud blagoslovljenim, a grijehe oproštenim s Tvojom milošću, o Najmilostiviji!

O Allahu, učini nas od onih koji Ti služe pokornošću, pomози nam da Te se sjećamo, da Ti zahvaljujemo i da Te iskreno obožavamo. Omili nam vjeru i uljepšaj je u našim srcima, a omrazi nam nevjerstvo, grijehe i nepokornost, i učini nas od onih koji slijede pravi put.

"Gospodaru naš, ne dopusti srcima našim da skrenu, kada si nam već na Pravi put ukazao, i daruj nam Svoju milost; Ti si, uistinu, Onaj Koji mnogo daruje!" (Ali Imran, 8)





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJJE
KOJU TOKOM HUTBE ELABORIRA." (PREPOROD)

HUTBE 

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

